


Махфийлик



10:00 / 21.05.2022 2790

Аллоҳ таоло Нисо сурасида айтади:

«Ва Биз сенга бундан олдин қиссаларини айтиб берган ва қиссаларини айтиб бермаган Пайғамбарларни юбордик». (Нисо сураси, 164-оят).

Оятда Аллоҳ «Қиссаларини айтиб бермаган» Пайғамбарлар ҳақида гап кетаяпти. Аслида биз таниган Пайғамбарлардан танимаганимиз кўпроқ. Биз танимаганимиз билан у Пайғамбарларнинг қадри озайиб қолмайди.

Демак, инсонлар сенинг фазилатингни билишмаса хафа бўлма. Бунинг сенга зарари йўқ. Сенинг кимлигингни Аллоҳ билса шуни ўзи етади. Нуҳ алайҳиссаломни таниганимиз қиёмат куни у зотнинг мезонларида ҳеч нарсани зиёда қилмайди. Аллоҳ бизга хабар бермаган ва биз улар ҳақида ҳеч нарсани билмайдиган Пайғамбарлар мезонидан қиёмат куни биз танимаганимиз учун ҳеч нарса камайиб қолмайди.

Хорун ар-Рашиднинг қўшинида 20000 аскар ўз номини қўшин девонига ёздиришмас эди. Улар маош олишмас, Аллоҳнинг билиши билан кифояланишар эди.

Соиб ибн Ақраға розияллоху анху халифа Умар ибн Хаттоб розияллоху анхуга Нақованд жангидан сүнг келиб ҳамдардлик билдириди. У кишига жангда шахид бўлган бир қанча машҳур саҳобаларнинг исмларини айтди ва сўзининг охирида «Ва мўъминлар амири танимайдиган бир қанча кишилар», деб қўйди. Шунда Умар ибн Хаттоб розияллоху анху йиғлаб юбориб дедилар:

«Умарнинг танимаслиги уларга нима заарар берар эди?! Аллоҳ танийди-ку!».

Абдулқодир Полвонов